

氏族典第三百十四卷

彭姓部彙考

國語 鄭語

史伯對鄭桓公曰祝融能昭顯天地之光明以生柔嘉材者也其後八姓於周未有侯伯佐制物於前代者昆吾爲夏伯矣大彭豕韋爲商伯矣當周未有己姓昆吾蘇顧溫董董姓饒夷豢龍則夏滅之矣彭姓彭祖豕韋諸稽則商滅之矣 彭祖大彭也豕韋諸稽其後別封也大彭豕韋爲商伯其後世失道殷復興而滅之

鄭樵通志 以國爲氏 夏商以前國

彭氏卽大彭之國在商時爲侯伯古祝融氏之後有陸終氏六子第三子彭祖建國于彭子孫以國爲氏又彭亦爲姓國語云祝融之後八姓己董彭禿姁斟曹莘周滅之楚有大夫彭仲爽彭名漢有梁王彭越大司馬彭宣後漢有彭寵望出宜春

廖用賢尙友錄 彭姓

彭隴西宮音

彭姓部列傳

商 彭祖

按神仙傳彭祖者帝顓頊之元孫也殷末已七百六十七歲而不衰老

周 彭宗

按尙友錄宗字法先彭城人年二十學于杖冲嘗從之採藥忽墮深谷手足傷損良久蘇息肅恭如初採樵被蛇所毒亦無愠色冲賢之乃授以丹經五千文宗寶而修之日臻幽妙或自臥水底竟日方出毒蛇猛虎能以氣禁之潛伏不動宗解之方去年百五十餘歲常如二十許厲王時老君遣仙官迎爲太清真人治赤城宮

彭名

按左傳成公十六年晉楚遇于鄢陵步毅御晉厲公欒鍼爲右彭名御楚共王潘黨爲右

彭生

按左傳昭公四年吳伐楚入棘櫟麻以報朱方之役楚沈尹射奔命于夏汭箴尹宜咎城鍾離薳啟疆城巢然丹城州來東國水不可以城彭生罷賴之師注彭生楚大夫

彭更

按孟子注彭更孟子弟子

秦 彭令昭

按尙友錄令昭歌師也始皇時武夷君會鄉人于幔亭峰令昭歌人間可哀曲歌罷彩雲四合環珮鏘然凌空而去

漢 彭越

按漢書彭越傳越字仲昌邑人也常漁鉅野澤中爲盜陳勝起澤間少年相聚從越乃行略地收諸侯散卒得千餘人沛公從碭北擊昌邑越助之齊王田榮叛項王漢使人賜越將軍印使下濟陰以擊楚大破楚軍漢二年將其兵三萬餘人歸漢漢王迺拜越爲魏相國將兵略定梁地常往來爲漢游兵擊楚絕其糧項籍死立越爲梁王都定陶陳豨反代地高帝自往擊之至邯鄲徵兵梁梁王稱

病使使將兵詣邯鄲高帝怒使人讓梁王梁王恐欲自往謝其太僕有罪亡走漢告梁王與扈輒謀反於是上使使掩捕梁王囚之雒陽上赦以爲庶人徙蜀青衣西至鄧逢呂后從長安東道見越越爲呂后泣涕自言亡罪呂后詔與俱東至雒陽言上誅之

彭宣

按漢書彭宣傳宣字子佩淮陽陽夏人張禹薦宣可任政事入爲右扶風遷廷尉以王國人出爲太原太守數年復入爲大司農光祿勳右將軍哀帝卽位徙爲左將軍歲餘上欲令丁傅處爪牙官迺策罷宣數歲諫大夫鮑宣數薦宣上乃召宣爲光祿大夫遷御史大夫轉爲大司空封長平侯會哀帝崩新都侯王莽爲大司馬秉政專權宣上書乞歸鄉里居數年薨

彭吳

按漢書食貨志彭吳穿穢貊朝鮮置滄海郡燕齊之間靡然發動

彭宏

按後漢書彭寵傳寵父宏哀帝時爲漁陽太守偉容貌能飲飯有威於邊莽居攝誅不附己者宏與

何武鮑宣並遇害

彭聖

按漢書恩澤侯表元始四年長平節侯聖嗣十四年薨

彭業

按漢書恩澤侯表天鳳五年長平侯業嗣王莽敗絕

後漢 彭寵

按後漢書彭寵傳寵字伯通南陽宛人少爲郡吏地皇中爲大司空士更始立拜偏將軍行漁陽太守事光武鎮慰河北至薊以書招寵寵歸光武光武承制封寵建忠侯賜號大將軍遂圍邯鄲寵轉糧食前後不絕光武追銅馬北至薊寵上謁自負其功意望甚高光武接之不能滿以此懷不平及卽位吳漢王梁並爲三公而寵獨無所加愈怏怏不得志朱浮與寵不相能浮數譖構之建武二年春詔徵寵寵意浮賣已上疏願與浮俱徵帝不許益以自疑遂發兵反拜署將帥自立爲燕王五年春寵齋獨在便室蒼頭子密等三人因寵臥牀卽斬寵頭置囊中馳詣闕封爲不義侯明日閤門不

開官屬踰牆而入見寵屍驚怖其尙書韓立等共立寵子午爲王國師韓利斬午首詣祭遵降夷其宗族

彭閎

按後漢書桓榮傳榮習歐陽尙書建武十九年辟大司徒府拜議郎會歐陽博士缺帝欲用榮榮叩頭讓曰臣經術淺薄不如同門生郎中彭閎揚州從事臯弘帝因拜榮爲博士引閎弘爲議郎

彭脩

按後漢書彭脩傳脩字子陽會稽毗陵人也仕郡爲功曹後州辟從事時賊張子林等數百人作亂郡言州請脩守吳令脩與太守俱出討賊賊望見車馬競交射之飛矢雨集脩障扞太守而爲流矢所中死太守得全

彭翼

按萬姓統譜翼宜春人獻帝時歷官建平長沙北海三郡太守封宜春侯

彭翬

按蜀志彭羸傳羸字永年廣漢人身長八尺容貌甚偉姿性驕傲多所輕忽羸仕州不過書佐後又爲衆人所謗毀於州牧劉璋璋髡鉗羸爲徒隸會先主入蜀羸欲納說先主乃往見龐統統致之先主先主以爲奇數令羸宣傳軍事指授諸將奉使稱意識遇日加成都既定先主領益州牧拔羸爲治中從事羸起徒步一朝處州人之上形色囂然自矜得遇滋甚諸葛亮累密言先主左遷羸爲江陽太守羸辭於是收羸付有司誅死

晉 彭祈

按萬姓統譜祈襄武人仕爲州別駕從事歷西郡酒泉弘農略陽四守累官封侯所至忠以衛上清以守己威以克敵恩以惠下

彭抗

按尚友錄抗字武陽累遷尚書左丞以疾辭歸師事旌陽又以女妻旌陽子旌陽嘉其誠恪凡諸祕要悉以傳之宋永初二年舉家於二月十六日白日昇天

唐 彭景直

古今圖書集成
按唐書影景直傳景直瀛州河間人中宗景龍末爲太常博士後歷禮部郎中卒

彭雲

按萬姓統譜雲宜春人自幼力學通陰陽圖緯隱居不求聞達元宗遣使者以蒲輪召之至再始行命之官不就辭歸孫伉貞元間舉進士歷官石泉令以能稱

彭偃

按唐書朱泚傳彭偃銳於進自謂爲宰相所抑鬱鬱不懌泚亂匿田家旣得用辭令一出其手故辭尤諄慢

彭畬

按萬姓統譜畬婺源人唐末黃巢亂畬率兄弟起義兵捍蔽鄉邑死之鄉人懷其德爲立廟宋開慶己未重慶受圍兵交空中見大旗曰婺源彭王圍遂解帥李遇龍上其事于朝加封王爵

彭彥章

按十國春秋吳彭彥章廬陵人吉州刺史玘之弟也天祐初彥章爲袁州刺史與撫州危全諷等連

兵攻洪州大將周本既擊敗全諷遂乘勝攻袁州執彥章以歸高祖署爲百勝軍使武義元年吳越兵自東洲入寇命彥章與裨將陳汾拒之已而戰浪山江彥章師敗績汾擁兵不之救彥章死焉高祖爲誅汾籍沒家貲命以其半賜彥章家廩其妻子終身

彭世昌

按尙友錄世昌字襲之宜春人謹身修行以名節自持楊行密據楚召爲長史未幾謝病歸隱于郡之修仁鄉一旦有豪猾子數百劫之曰吾徒遭亂世未有所託方今德民而智有餘者莫若君請隸焉世昌正色叱之曰梁汴之間真人出矣譬之日也四方鼠輩其猶燭火不息欲求成事者未之有也不知命數而逞無窮之欲智者不爲也敢辭三請之不從設棘實繫其上而焚之

彭蟾

按尙友錄蟾字東瞻宜春人好學不仕以處士稱重修唐韻及著鳳池本艸廟堂龜鑑共一百二十卷有詩十一首見宜春集

後晉 彭璫

按萬姓統譜璫字武仲崇安人祖遷官至千牛衛上將軍父漢台州軍事判官璫通達經史家饒于財性喜釋典與和永禪師善于所居之東建精廬與師居焉南唐間爲建州兵馬都監詣金陵上書請以溫嶺鎮爲崇安場璫仕至殿中監後人以其有奏請之功爲之立祠

彭曉

按十國春秋後蜀彭曉字秀川永康人也廣政初授朝散郎守尙書祠部員外郎賜紫金魚袋善修煉養生之道別號貞一子常分魏伯陽參同契爲九十章而註之以應火候九轉餘鼎器歌一篇以應真鉛得一旦爲圖八環謂之明鏡圖行世

宋 彭乘

按宋史彭乘傳乘字利建益州華陽人少以好學稱州里進士及第奏乞侍養居數日授漢陽軍判官遂得請以歸久之除鳳州團練推官天禧初用寇準薦爲館閣校勘改天平軍節度推官預校正南北史隋書改祕書省著作佐郎遷本省丞集賢校理懇求便親得知曹州父卒服除知荆門軍改太常博士召還同判尙書刑部領吏部流內銓三班院爲羣牧使病卒

彭任

按萬姓統譜任廣安軍岳池人慶曆初富弼使遼任與偕行道次語弼曰朝廷所謂書詞萬一與口傳異將何以對敢視果不同弼卽馳還朝更書而去

彭孫

按連城縣志孫字仲謀皇祐間應募勦江南劉石鵠平辰州賊田元猛繼討嶺南交趾皆有功瀘南蠻乞弟叛上召問方略孫與韓存寶議不合乞歸明年再召上曰存寶逗留不進乎孫奏曰存寶不易得願寬假以竟後功乃宥之尋命進兵討河西獨以三千軍獲鎰重六萬明年復建言願得藉兵五萬人靈州可得進劄十五通皆邊防機密大事適神宗不豫寢不報尋乞老歸

彭汝礪

按宋史彭汝礪傳汝礪字器資饒州鄱陽人治平二年舉進士歷保信軍推官補國子直講改大理寺丞擢太子中允爲監察御史裏行元豐初以館閣校勘爲江西轉運判官代還提點京西刑獄元祐二年超爲起居舍人踰年進中書舍人會知漢陽事吳處厚得蔡確安州詩上之傳會解釋以爲

怨謗宣仁后欲寘之法汝礪上疏論列不聽及確貶新州遂落職知徐州拜吏部侍郎言者謂嘗附會劉摯降待制知江州病卒

彭汝霖

按宋史彭汝礪傳汝礪弟汝霖字巖老第進士以曾布薦爲祕書丞擢殿中侍御史由是附布遷待御史布失位汝霖罷知泰州又謫濮州團練副使後以顯謨閣待制卒

彭汝方

宋史彭汝礪傳汝礪弟汝方字宜老以汝礪蔭爲滎陽尉臨城主簿汝礪卒棄官歸葬豐稷留守南京辟司錄宣和初通判衢州使者疏其治狀擢知州事方臘起睦之青溪與衢接壤寇至無兵可禦汝方守孤城三日而陷罵賊以死諡曰忠毅

彭思永

按宋史彭思永傳思永字季長廬陵人第進士知南海分寧縣通判睦州台州知潮州常州入爲侍御史轉司封員外郎爲湖北轉運使移益州路擢天章閣待制知瀛州徙知江寧府治平中召爲御

史中丞神宗卽位思永出知黃州改太平州熙寧三年以戶部侍郎致仕卒思永仁厚廉恕居母喪寢甚鄉人餽之無所受子衛亦孝謹以父老棄官家居十餘年族里稱之

彭瑜

按宋史彭瑜傳瑜字君玉吉之安福人熙寧間失其母瑜朝夕焚香祈天願知母所在如是十餘年俄有人言母爲泰和倪氏婦瑜竟迎以歸

彭衛

按萬姓統譜衛字明微思永之子也少謹厚讀書不事科舉業思永喪哀毀以孝聞元豐四年以宣議郎致仕判趙州日民之鬻蔬者例出蔬供郡官以免身役衛知其說義欲不取而惡違衆告園丁曰我家食蔬少爾持歸鬻之積錢爾家待我終更併取也訖去不復問其清畏人知如此杜門晦迹不求利達不事祠禱不延桑門不喜卜筮年七十六卒

彭持

按萬姓統譜持字知權分宜人少喜學西漢文爲諸生時知軍州事張頤稀接士求見者先令作詩

賦方得通繇是士無敢進者持奮曰是謂秦無人矣因求入謁願令作日新之謂盛德賦藏器待用詩皆立就張大稱賞貢入太學與臨江孔武仲齊名擢進士甲科元豐間累至司農丞出爲監司終奉議郎江西提舉

彭戢

按萬姓統譜戢徐州人元豐中舉進士第爲兩浙提舉奉祠常蓄雙鶴江左士大夫送行有扁舟載雙鶴萬卷貯群書之句

彭舉正

按萬姓統譜舉正萍鄉人有節行張士遜在相府聞其名辟之門下嘗夜試之舉正不爲動以特奏名補國子博士

彭天益

按萬姓統譜天益攸縣人登元祐三年鄉薦崇寧初爲太學博士以議論不合出爲湖南提舉大觀初上封事力言權奸誤國五十卽致仕居司空山翛然有物外意所著有瑞麟集

彭淵材

按尙友錄淵材宜豐人平生喜遊出入京兆貴人之門十餘年父以書呼之歸侍一日同一黥徒負一布囊而歸一邑聚觀意囊中皆金珠也淵材曰我富可埒國及解開止有李廷珪墨一丸文與可竹一枝歐陽公五代史藁一巨編而已淵材嘗自言平生有五恨一恨鱗魚多骨二恨金橘帶酸三恨萼菜性冷四恨海棠無香五恨曾子固不能詩善曉大樂嘗獻樂書除協律郎時洪覺範奇于詩鄒元佐奇于命淵材奇于樂號新昌三奇姪覺範爲僧名惠洪有冷齋夜話甘露集林間錄行于世

彭超然

按尙友錄超然覺範之弟也爲人純厚善論詩極有風味嘗曰詩貴得于天趣覺範曰何以識其天趣曰能知蕭何所以識韓信則天趣可識矣覺範竟不能屈

彭俞

按尙友錄俞字濟川宜春人少隱集雲峰學邃于易自號連山子紹聖四年進士知漂陽縣事理冤獄甚多監司連薦之稍遷至朝散郎俞所著有君子傳三卷循吏龜鑑十二卷貫通篇五卷時議二

卷文集二百卷

彭路

按崇安縣志路字通吉吳屯里人屢試不第嘗夢神人告以路謨二字遂取爲名崇寧三年以特奏廷對爲第一徽宗大爲褒賞

彭拯

按崇安縣志拯字原中吳屯里人政和二年登進士第授撫州法曹歷真婺二州教授除辟雍正陞辟雍博士出倅沅州

彭合

按萬姓統譜合廬陵人高宗時爲清江主簿以土瘠賦重力請蠲減後爲京西總領卒于官喪過清江民相聚爲肖像立祠長子商老爲南雄州司理仕至南安通判次子漢老知常德府有豪民劉庚誣其悍僕爲盜漢老審鞫僕免誅死

彭爽